

Lizarraga

(Lizarra)



ETXEBERRIA TOLOSA familia

LIZARRA Elbarrena auzoko baserria da. Etxeberria familiakoak etxe jabeak dira 1983az geroztik eta 1985ean erabat berritu zuten baserria. Eraikinaren azpiko aldean baserri zaharra zegoen eta baserri berria altxatzerakoan zaharreko zenbait egur erabili omen zuten. Baserri inguruko hainbat parajeren izenak hauek dira: *Etxaburu*, *Agotz soro*, *Muñota buru*, *Baso txiki*, *Muñota azpi*.

Auzoko bidea 1938an egin zuten, eta etxeko ataritik, Ordiziara bidean, Abaltzisketa, Gaintza eta Baliarraingo hainbat baserritar pasatzen zen. Eskolara bizikletan joan ohi ziren eta ordu laurdeneko bidea zegoen.

1896an ezkondu ziren *Lizarrako* Joxe Mari Etxeberria eta Gaintzako *Mendizabal* baserriko Ramona Oiharbide.

1931n berriz, ezkondu ziren hauen seme Franzisko Etxeberria eta Gaintzako *Aranburu* baserriko Estefania Tolosa. Gaintzako etxean egin zuten otordua eta ezkontza bidaian Toledoraino iritsi ziren. Estefaniaren aitona Kubako gerran ibilia zen.

Baserrian bazituzten sei-zazpi behi eta txerriak. Soroetan, batez ere, artoa ereiten zuten. Sagarra eta gaztaina ez zuten falta. Baratza txiki batek etxerako adina ematen zien. Ordiziako ferian saltzen zituzten artoa, sagarrak, gaztainak eta esnea.

Aitak ba omen zuen Nafarroako baimena “kosexadore” bezala errotan irina egiteko eta horri esker, errotariak aprobetxatzen omen zuen irin gehiago egiteko eta Ordiziako feriara, esne-marmitetan disimulatuz, irina eramaten omen zuten, hau ere han saltzeko.

Aitona Joxe Mari 1930 urte inguruan tratuan ibiltzen omen zen. Urte batean hemezortzi mila kilo sagar zakutan bildu eta barkuan Asturias aldera bidali omen zituen.

Udazkenean, astero milaren bat kilo gaztaina eramaten omen zuten Ordiziako feriara, baina horretarako atzaparrak ondo zulatzen ziren, gaztaina biltzen, eta gauetan, errosarioa erreztatzen zuten bitartean, gaztainak morkotxetik apartatzen zituzten.



Informazio emaila:
Joxe Mari Etxeberria



ETXEBERRIA OIHARBIDE familia. 1927

Joxe Agirre, Xalbador Etxeberria, Frantzisko Etxeberria, Prantxika Etxeberria, Joxepa Etxeberria, Xole / Jobita Etxeberria, Ramona Oiarbide (ama), Joxepa Irastortza, Joxe Mari Etxeberria, Roxita / Daniel, Maria Angeles eta Lurdes.



ETXEBERRIA TOLOSA familia. 1931

Frantzisko Etxeberria eta Estefania Tolosa.



ETXEBERRIA TOLOSA familia. 1960

Joxe Mari, Joan Mari / Jabier, Maria Jexux, Jobita, Joxe Leon Navarro, Maria Auxilia, Lurdes / Xalbador, Frantzisko (aita), Estefania (ama) eta Elias.



Estefania, Joxe Mari, Joan Pablo II.a eta Anjel Sukia kardinala.